



# IFA USUN EPWE CHOK MECHERES ACH APASA ACH KAPASEN PWARATA

*lamwir wewen pwarata. Ewe tawechun iamwir mi tongeni anapano ach tufichin sipwe apasa ach kapasen pwarata non napanap mi kokkotoch me ese kokkotoch.*

Sia fen fori pwon mi pin pwe sipwe “chon pwarata usun Kot fansoun meinisin me non mettoch meinisin, me non neni meinisin” (Mosaia 18:9). Ach apasa ach kapasen pwarata ina pekin ach chon pwarata me ew napanap mi mamaman ne tungor ewe Ngun mi Fel epwe amwokutu netipen emon me siwini manauer.

“Kapasen Pwarata—ennetin kapasen pwarata, mi fis me ren ewe Ngun me kapunguno me ren ewe Ngun mi Fel—a siwini manau,” Preseten M. Russell Ballard a apasa, ewe a Wisen Presetenin ewe Mwichen ekkewe Engon me Ruemon Aposel.<sup>1</sup>

Nge ach sipwe apasa ach kapasen pwarata mi tongeni an epwe anoninen me anuokus ngeni ekkoch

me neich. Menin pokiten sia ekieki pwe ach apasa ach kapasen pwarata a chok och mettoch sia fori non mwichen echikifen me mwichen kapasen pwarata ika nupwen sia asukuna ew nesen. Non ekkenan fansoun mi akokkotoch sia kan soun aea ekkoch foun kapas me porous usun ese fich ngeni non pwisin fansoun aporous.

Ach apasa ach kapasen pwarata mi tongeni efi-ochukich iteiten ran non manauach me manauen ekkoch nupwen sia weweiti ifa usun mecheresin ach sipwe afanafana met kich mi nuku non nonnomuch iteiten ran. Ikkei ekkoch ekiek repwe anisuk om kopwe poputa.

## **Fori Epwe Mecheres**

Ew kapasen pwarata esap chok poputa ren ekkewe foun kapas, “Ua mochen upwe apasa ai kapasen pwarata,” me esap chok mwuchuno ren, “Non iten Jises Kraist, amen.” Ew kapasen pwarata ew napanapen met kich mi nuku me sinei pwe mi ennet. Iwe ren om churi chon orum we won ewe aan usun an we osukosuk me apasa, “Ngang mi sinei pwe Kot mi ponuwani iotek,” mi tongeni watte manamanan usun ew kapasen pwarata mi fis me ren ewe rong non fan. Ewe manaman ese feito seni kapas echipwer; a feito seni ewe Ngun mi Fel an apungano ennet (nengeni Doctrine and Covenants 100:7–8).

## **Fich ngeni Mwokutukutun Pwisin Fansoun Aporous**

Ika kich mi mochen aea ngeni ekkoch, mi wor tufich unukuch ach sipwe akuchanong kapasen pwarata non aporous iteiten ran. Ren awewe:

- Emon a eisinuk usun met ka fori won Ammon me Raninfel. “A men och,” ka ponuwani. “Fan ina chok met a murino ngeniei.”
- Emon a apasa an mefi netipeta mwirin an sinei usun ew mettoch mi weires non manauom: “Fokkun omusano.” Ka ponuwani: “Kinisou ren om aurek. Ngang mi sinei pwe Kot epwe anisiei. Mi fen nonnom rei me akkom.”
- Emon a apasa: “Ua anean pwe ei raningaw epwe mwitir siwin,” ika “Ennetin ewe pas a mang,” ika “Nengeni ei osukosuken taraku won an.” En mi tongeni ponuwani: “Ngang mi nuku Kot epwe anisi mettoch meinisin epwe wesino.”

## **Aporousa Om Memef**

Sia kan soun kapas fengen usun ach osukosuk. Nupwen emon a urenuk usun met ra weri, en mi tongeni aporousa ew fansoun nupwen Kot a anisuk non om sossot me pwarata pwe en mi sinei pwe I mi tongeni pwan anisir. Ewe Samon a apasa pwe A apochokuna kich non ach sossot “pwe oupwe uta pwe oupwe chon pwarata ngeniei mwirin, me pwe oupwe tongeni ennetin sinei pwe ngang, ewe Samon Kot, ua churi nei aramas non ar riaffou” (Mosaia 24:14). Sia tongeni uta pwe chon pwarata usun I nupwen sia pwarata ifa usun I a fen anisikich non ach sossot.

## **Oupwe Mwonneteta**

Ren ekkoch me neich, ach sipwe apasa ach kapasen pwarata non weiweita mi tongeni an epwe anuokus. Mi wor ekkoch aanen sipwe tongeni amwonneteta me mwan me “amonnata fansoun meinisin pwe oupwe

tongeni ponuwani emon nupwen epwe eisini [kich] ussun minne [sia] epinukunuku” (1 Peter 3:15).

Aewin, ach mwonneta mi tongeni wewengeni ach sipwe nengeni ifa usun nonnomuch. Kich mi mutanong ewe Ngun mi Fel non manauach me apochokuna pwisin ach kapasen pwarata iteiten ran ren ach manau wenechar? Kich mi atufichi an ewe Ngun epwe kapas ngenikich me ngenikich ekkewe kapas mi auchea ngenikich seni iotek me kacon pukefel? Ewe Samon a aourora Hyrum Smith, pwe sisap achocho ne afanafana an kapas, nge akkom achocho ne angei an kapas, pwe mwirin epwe suk awach (nengeni Doctrine and Covenants 11:21).

Oruwan, om mwonneta mi tongeni wewengeni om neneno mwom me ekieki ekkoch tufich epwe wor reom non ena ran ika ena wik om kopwe apasa om kapasen pwarata. En mi tongeni mwonneta ngeni ekkena fansoun ren om ekieki ifa usun repwe tongeni awora ngonuk ew tufich ne apasa met en mi nuku.

## **Kopwe chok Ionapei ewe Chon Amanau me An Annuk**

Preseten Ballard a aitikich, “Ina mwo ika kich chon ei Mwichifen mi tongeni wor ach kapasen pwarata usun chommong mettoch, mi wor ekkoch nongonongen ennet mi auchea ach sipwe soun aiti fengeni kich me aea fengen.” Usun awewe, a etettenatiw: “Kot I Samach me Jises I ewe Kraist. Ewe kokkoten amanau mi ionap won ewe Achese fanin ewe Chon Amanau. Joseph Smith a eniwinato unusenapen ewe kapas allimen Jises Kraist esemuch, me ewe Puken Mormon mi pwarata pwe ach kapasen pwarata mi ennet.” Nupwen sia apasa ekkei ennet seni ennetin netipach, sia mut ngeni ewe Ngun epwe pwarata pwe met sia fen apasa mi ennet. Preseten Ballard a pesei pwe “ewe Ngun ese tongeni epwe mwoch nupwen ennetin kapasen pwarata usun Kraist a fis.”<sup>2</sup>

## **An ewe Chon Amanau Nenien Appiru**

Apwangapwang seni ew sai non Samaria, ewe Chon Amanau a kouno an epwe asoso ren ew ito me churi emon fefin ikewe. A poputani ew aporous usun an itit konik seni ewe ito. A aea ei angang mi fis iteiten ran minne ewe fefin mi fofori a awora ngeni Jises ewe tufich ne pwarata usun ewe konik mi manau me manau esemuch mi fich ngeni ekkewe mi nuku non I (nengeni John 4:13–15, 25–26).

## **Ew Kapasen Pwarata mi Mecheres mi Tongeni Siwini Manau**

Preseten Russell M. Nelson a fen ureni emon kangof ewe a fen eisini Nelson nupwen an we emon

tokter ew kapaseis mwirin ew angangen reirei mi aweires. “Pwata kose usun ekkoch chon reirei?” Ekkoch chon reirei neminewe mi sinei ir mi nisosong me rese sufonoch nupwen ra fori ekkenan angangen reirei mi aweires.

Dr. Nelson mi tongeni epwe ponuwani non chom-mong napanap. Nge a chok ponuwani, “Pokiten Ngang mi sinei ewe Puken Mormon mi ennet.”

Ponuwani we me ren a pesi ewe kangof me punu-wan we ar repwe kaeo ewe Puken Mormon. Mwirin Preseten Nelson a papataisei ewe kangof. Chom-mong ier mwirin, nupwen an emweni ew mwichen steik non Tennessee, USA, nupwen an keran emon Aposel mi epinipinino, Preseten Nelson a pwapwaiti echusefan ese akokkot ngeni ewe chok pwan kangof. Neminewe a aporoussa sefan pwe an ewe ekkesiwin, a fis pokiten an we kapasen pwarata mi mecheres me ewe pochokunen ewe Puken Mormon, a emweni ekkesiwinin pwan 80 aramas.<sup>3</sup>

### Tingoren Foffor

Ousap nuokus ne apasa ami kapasen pwarata. Mi tongeni efeiochu ekkewe oua iamwir ngenir. Ifa usun

oupwe aea ekkei kokkot ika pwisin ami ne apasa ami kapasen pwarata ikenai?

Ekkewe toropwen “Nongonongen iamwir” ra fis pwe repwe anisikich ne kaeo ach sipwe tumunu fengeni kich—sisap afanafana fansoun iamwir. Nupwen sia sinei ekkewe sia angang ngenir, ewe Ngun mi Fel epwe anisikich ach sipwe sinei met porous mi auchea ngenir kapach ngeni ach tumun me kirekiroch.

### APOROUSSA OM MEMEF

Tinato om memef nupwen ka iamwir ngeni ekkoch ika ekkoch ra iamwir ngonuk. No ngeni liahona.lds.org me tiki “Submit an Article or Feedback.”

### ESINESIN

1. M. Russell Ballard, “Pure Testimony,” *Liahona*, Nov. 2004, 40.
2. M. Russell Ballard, “Pure Testimony,” 41.
3. Non Jason Swensen, “Be Ready to Explain Your Testimony Using the Book of Mormon, President Nelson Says,” *nenien Church News* won LDS.org, Feb. 6, 2018, news.lds.org.